



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

Imran Khan-i ex-army chief Bajwa anema bushisüngdangtsü akhanger

Football asayar tejen Tulsidas Balaram süogo

VOL. XX NO. 126 (ADOK 126)

DIMAPUR ROGONÜ (FRIDAY)

TSÜKLAI (FEBRUARY) 17, 2023

₹ 5.00

Kanga kumdanga jembishinüba nungi FA ya kümtet: Congress Kohima, Tsüklai/February 16 (TYO): Küm aika kanga kumdanga jembishinüba aruba tajangzükji Naga Political Issue atema Framework Agreement zülutepba ya lir, saka iba indang tejangja shingai memetet, ta Congress lenir aser MP, Jairam Ramesh-i Brehostibarnü ashi.

"August 3, 2015 nung Ato Kilonser Narendra Modi-i Naga nung tebilemstü ken o atema Framework Agreement zülutepba sangdong aser iba ya pela agizük, kechiaser nübür ajungai aser talisa Congress-i Nagaland nung yimjung, tesünap aser terenlok aginer, saka küm ti süyogo aser asenok tanü tashi iba agreement tejangja atatepa lir," ta Ramesh-i osangbener senden ka nung ashi.

BJP-i Nagaland election atema par manifesto sayaogo saka Framework Agreement indang ojang kata maliba ya testümgangtsü mapa ka lir, ta pai ashi.

Yimsüsüba menden nung alidang Naga nung tebilemstü angateteptsü asoshi Congress-ia kechi inyak ta asüngdang dang, Congress sorkar melentepa arudang Nagaland nung yimjung taneben

bener arutsü atema temolung agüja inyak, kechiaser aji melira administration mesüra rongsenketzüng maparen mesüra danga maparen kecha makoktsü, ta pai langzü.

"Yimjung aser tesunep ya mezüng südaksür inyaka aru aser Congress ajanga 1990s tiyonglen nungi Naga nung terelok balala indang lenirtem den yimtenren tsütsü nungi jembishinüba nung ajemdaker 2015 küm Framework Agreement ya zülutep aser ibai Nagaland nung anogo tasen ka tenzüker asütsü ta asenok ajaki imla liasü," ta pai ashi.

"Asenok tanü tashi iba FA tejangja metettsü yongya atar, saka BJP-i par manifesto nung iba agreement aser Naga nung tebilemstü inoksemstü temsüa majitet," ta pai ashi.

2018 küm BJP ajanga Naga nung dang 'election for solution' ta yimyim ayimoktsü saka tangbo 'election for confusion' ta melenogo aser par den külemi aliba NDPP ajanga 'change is coming' ta ayima aliba tangbo 'change is gone' kumogo, ta Ramesh-isa ashi.

Tanü Nagaland-i Union minister ana BJP nübuyimi arutsü

Dimapur, Tsüklai/February 16 (TYO): Nagaland nung election agitsü aliba mechi BJP candidate tem asoshi nübuyimstü BJP national general secretary densema Union minister ana Hukulbarnü arutsü.

Brehostibarnü Dimapur nung osangbener den jembidang BJP State Media Cell convenor Saprulu-i ashiba agi, Union Minister of Law and Justice, Kiren Rijiju-i Longwa public ground nung public rally ka nung jembitsü aser iba sülen 44 Phomching aser 41 Tizit Assembly Constituency tem nung senden amentsü.

Tizit nung Union minister ya meina P. Paiwang Konyak aotsü aser iba sülen Paiwang'er kidang party senden ka amentsü.

Union Minister of Ports, Shipping & Waterways and AYUSH Sarbananda Sonowal-i Wokha aser Mon town nung public rally nung jembitsü. Pa meina Deputy Chief Minister Y Patton aotsü.

BJP national general secretary

B L Santhosh-i Tuensang, Mokokchung aser Zunheboto semdangtsü aser February 18 nü Dimapur-i meyiba shilangtsü.

BJP manifesto nung Congress-i tai apuba indang langzüdang Saprulu-i ashiba agi, state nung Congress-i küm 15 dak tema yimsü süa aru saka tenük agi ajitetsüsa temelenshi aser tejakleni aoba mali.

BJP yimsüsüba aruba sülen state nung mapang tatsüka tsüngta terenlok jenti angur, ta pai ashi.

Lai Congress dang o inteptsü asoshi par manifesto tener arutsü ayongzük.

Party indang nükla kar lemsatepdang Saprulu-i ashiba agi, party-i tetsür temeden aser tashi asoshi inyaksü aser Neidonuo Angami Women Welfare Scheme tenzüksütsü, kong tetsür asoshi shia atema bond sen 50,000 alitsü aser iba kübok tetsür kaketsür shia Class 6 nung sen 3,000 agütsütsü, Class 9 nung sen 5,000, Class

11 aser 12 nung sen 7,000 agütsütsü, graduation sülen kibong makum aliba tetsür kaketsür shia nem sen lakh ana agütsütsü.

Onoki KG nungi PG tashi tetsür kaketsür ajunga nem angati education tajung agütsütsü aser CM Free Scooty Scheme semzükja jenjang tajung nung takok nguteter college-i aor tetsürtem nem angati scooty agütsütsü, ta ashi.

Loktiliba aser rongsenketzüng tsütsü tetsür SHGs tali tentettsü ajungmesoa Temsula Ao Empowerment Mission tenzüksü aser parnok nem credit linkages agütsütsü, ta lai ashi.

Tetsürtem kumzüka ayutsü atema sorkari Women Warrior Battalion amenoktsü, koba state nung tetsür kisüng aliba police battalion alitsü. Tetsür ketdangtsürtem kisüngi anepaliba desk temeja ka-ka police station shia amenoka tetsürtem anema mapa tamajung inyakba azüoktsü, ta Saprulu-isa metetdaksü.

NATIONALIST DEMOCRATIC PROGRESSIVE PARTY (NDPP)

Facta non Verba

- Protecting our AGE OLD TRADITIONS
- Preserving our RICH CULTURAL HERITAGE
- Promoting our LEGENDARY FESTIVALS

NAGALAND - TOWARDS A STATE OF EXCELLENCE



PUBLISHED BY : NDPP MEDIA & COMMUNICATION COMMITTEE.

FOLLOW US @NDPPOFFICIAL

" Nai koba tejang züngdir iba süngdong meyitsü. Tajung süli tamajung süli nai achitsü mesüra ner chirnuri achitsü " Anonymous

- Ungma Baptist Arogo Laishir Telongjem Clean Election Tayongzükba

INC candidate Supongmeren-i Penli, Alongmen & Lijaba ward-tem semdang



25 Mongoya A/C nungi Congress candidate, S. Supongmeren Jamir-i Lijaba Lijen ward semdangba mapang parnok yimden tenzükertem den külemi tangokba noksa. Mokokchung, 16th February, 2023

Mokokchung, 16th Feb (TYO): 25 Mongoya Assembly Constituency nungi Indian National Congress (INC) Candidate, S. Supongmeren Jamir-i 16th Feb, 2023 nü Penli, Alongmen aser Lijaba Lijen ward-tem semdanga pa election-i aiba sangdonga pa nükjidong lemsatapa jajaogo. Pai item ward-tem semdanga jajaba mapang, BJP-i aniba sorkari nüburttem nem tapu tapu agütsüba amai yimjak nungbo sayur, saka tip külen par sorkari saru (tax) ya sashia agir, yamaji state sorkaria tax onsara agir, anungji, Congress sorkar arura itemji tajungba yanglushia aotsü, ta metedaksü.

Yimjak nungbo BJP-NDPP na lungjemer (coalition) amai sayur, saka telung nungbo nüktabangtar, tenapronglai

tanga party nung candidate yoktepa kuli lir, ta ashi. Congress party bo secular front tangatetba nung dang aotsü saka BJP denbo kodanga külemi maotsü, ta paisa shisem.

Naga nunger atema Congress ya dang tapet party ka lir, kechiyong iba party yagi tejak/kin merepranger-i ajak nem sakuku maongka agütsür, aser Congress party-i 'clean election' nung amanger aser nungitter, ta ashi.

"MLA term ka inyakdang opposition dang liasü saka ni akokba tashi nübör tenzükogo saka tatsüka dang inyak nungji tebilemba ajak metongtet, aser ni Mongoya Constituency tia ajak meteta lir, anungji, tang ya mangdang aika bener noktaker asünung, imlibilema kü nem ano yimli khen agüjang", ta paisa

mepishia ashi.

"Opposition nung süaka, ruling nung süaka, ni adoktsüra terenlok agütsütsü aser constituency sanger maak mesütsütsü", ta pai shiogo. "Ni adokra, grass-root-i alur nüburi aginüba ama inyaktsü nangzüker", ta paisa shisem.

Tanü joko Govt. mapa angutsü kanga tasak kechiyong asen lima Govt. mapa inyaktsü maongka apara, anungji, lanurtem asoshi mapa inyaktsü maongka bushia lenmang balala sayutsü, ta paisa teinyaktsü kar lemsatap.

Longsa nunger S. Supongmeren Jamir ya 2003 nungto Congress ticket nungi adoka MLA khen inyakdanga lir. 2008 & 2018 nunga toktepogo saka tamakok angu. Tang election-i aiba ya zünga 4 ben air asütsü.

Dimapur nung kitsük-kirong lendong atalok

Dimapur, Tsüklai/February 16 (TYO): Brehostibar nep 11:00 ako meta Dimapur kübok K Sachu colony nung kitsük-kirong lendong ka adoka kibong 37 talidak ki maka rongdokogo. Ajisüaka asü-amaba

osangbo mali. Iba kitsük-kirong lendong adokba kuli monguteti lir saka iba lendong nung sen lakh aika jenjang osettsüset samaogo.

Iba mi remseptsü asoshi fire tenders trok yoka liasü aser mi tali kaoloka aotsü aliba

nokdangtet, ta Fire department nungi ketdangsur kati ashi.

Iba osang angashili MLA Moatoshi Longkumer aser Y Vikheho Awomi nati iba tesem semdanga iba lendong agi kongshia alir nem senotsü aser osettsüset teyari agüja liasü.

CM RIO-i Imnatiba nübuyim tenzüktsüogo



Changtongya, February 16, 2023: Bodbar anogo Changtongya town local ground nung NDPP ticket nungi sitting MLA Imnatiba Arkakong constituency asoshi nübuyim tenzükogo. Iba sentong nung Metsübu, Hon'ble Minister ajanga jembidang ashiba agi Imnatiba tanaben shimtetra taruba sorkar akümdang menden tajung akutsü. Party nung seniority-ji kanga tongtibang, anungji ruling government nung menden tajung department tulu abentsüsa lanur rongnung temulung lemtetba lenir Imnatiba Arkakong sangeri shimtetang ta nüburttem ayongzüka liasü.

Jonathan Rongsen Longkumer, shiba Nagaland Senior Cricket Team nung captain lir, pai sentong nung jembidang ashiba agi tanü asen lima Imnatiba ama mangdang akaba lanur lenir ka nungdaker. Lanur kati yimsüsüba menden nung mener lanur asoshi inyaktsütsü mapa aika lir. Anungji Arkakong sanger ajak teka amteper lenir tanaben

shimtetdi ta shia liasü.

NDPP Candidate Imnatibai, Hon'ble Advisor ajanga nüburttem ayongzüka jembidang tang Rio ama leadership tajung alidang Arkakong nungi tanabenren MLA shimtsübaaji tensa den apert mapang tajung lir. Anungji ruling government NDPP ticket temulung lemteta agütsüba ama asenoki takok angutsü asoshi nübör ajaki nongita merangtepa inyakdaksünür ta shia liasü.

Nagaland Chief Minister aser Star Campaigner Neiphui Rio ajanga ashiba agi, "Naga lima asen sasa state achaaayanga bener aotsüsa makokba agi Centre nung koba government lidir parnok denji teka amteper parnok teyari agia aotsüsa akümer. Iba jagi NDPP-BJP pre-poll alliance yanglur election nung tokteper. Tang lenir shiba shimtetang ruling nung mendir pa jagi election sülen Naga Political keno nung tongti shilem agitetsü anungji nenoki Shri Imnatiba-ji tanaben shimtetang. NDPP kijai seat 30 dak tali nung takok angutsü nükla lir

aser iba takok mangdangji Arkakong sanger teka nung lir. Nüburttem teka amteper Imnatiba adokdakang aser asenok ajak ano küm pungu ruling government nung lia temoatsü külemi lemsatapa agitsü." Ano paisa "takok anguba dang masü saka taoba election nung akokba dang nungi vote teimba agi akoktsü merangang. Election nung takok ngur Changtongya nung asenok ajak külemi pelatepba benjong amungtsü yongya atar." ta shia pa o tembang.

O. Wati Jamir, Joint Secretary CEB NDPP ajanga sentong ani, Rev. Temshi, Pastor, CTBA ajanga sarasademer sentong tenzük. Alienba, President, 22 Arkakong Constituency ajanga tarur pela shishi agizük. Tayongzüka o item yagi jemi-Aolepden, Vice President, CEB NDPP, N. Bendang Jamir, President, NDPP Mokokchung Region. Tatem sarasadem Chuba Aier, Pastor, Yaongyimsen Baptist Arogo ajanga sarasademer sentong tembang.

NSACS-i Mobile ICTCS gari tenzüktsüogo

Dimapur, Tsüklai/February 16 (TYO): Commissioner & Secretary Health & Family Welfare aser Nagaland State Aids Control Society (NSACS) mendenbuba Y. Kikheto Sema, IAS-i Mon, Tuensang, Longleng, aser Noklak district atema February 16 nü Directorate of Health & Family Welfare nung Mobile Integrated Counseling & Testing Centers (ICTCS) pezü officially tenzüktsüogo.

Sentong nung o jembiba mapang Y. Kikheto Sema, IAS-i, linük nung HIV positivity rate timtiba aliba state tem rongnung Nagaland tanabuba jenjang nung lir, aser nüburttem nem HIV indang tangazükba

agütsütsü aser HIV agi tonger alirtem temang nepalutsütsü aser tashidak takarataba nung potettsü atema nüburttem nem facility tajung agütsütsü kanga nungdaka lir, ta ashi.

Kasa mapang nung Project Director, NSACS, Dr. Akuo Thorie-i, Mobile ICTC tem tenzüktsüba nükjidong lemsatapa liasü.

Mobile ICTC tem tenzüktsüba sentong tembangba sülen IDSP Hall, Directorate of Health & Family Welfare nung osangbenertem den sensaksemba mapang tatsüka agi, kong NSACS, Food Safety, aser Drug Control Department tem nungi ketdangsurtemi shilem agia liasü.

Yimjung, teputep aser terenlok atema inyaker: Tovihoto

Dimapur, February 16, 2023 (TYO): 1 Dimapur-I Assembly Constituency nungi BJP candidate H. Tovihoto Ayemi-i Bodbarnü municipal ward 5 aser 6 semdangogo.

Tanü Tovihoto den külemi pa pusemertem aser party lennirtemi Police colony, Bank colony, Fire Brigade colony, Namgalong colony, Haralu colony sector I & II, Power House colony, Over Bridge colony, Hongkong Market area, Hazi Park area aser Rail Bazaar area nung senden balala ayonga amen.

"Constituency nung alirtem ajungkettsü atema akokba tashi merangogo aser tajung kar danga inyakba ajitetra maneni yaridaksünür" ta Tovihoto-i ashi.

Pai nübortem tsungda yimjung, teputep aser terenlok atema tongti süa inyaker aser maneni tarutsü nunga inyaktsü ta ashi.

Telongjem aser ka akümba ajanga ajak akoker anungji Dimapur-I constituency nung alirtem longjemtsü aser election nung tipema aser ochishia vote enoktsütsü ayongzüker, ta paisa ashi.

Prime Minister Narendra Modi-i aniba party nem takok ngudakjang kechiyong iba party ajanga linük nung nisungtem taküm melenshütsüogo, ta Tovihoto-isa shisem.

Nagaland nung BJP-NDPP teloktep ajanga nübortem asoshi mapa tuluba inyaktsü, ta paisa ashi.

IT osettsüset agütsütsü atema IT Firms 21 shimer

Dimapur, Tsüklai/February 16 (TYO): Information & Technology Department ajanga February 13, 2023 nü sangdong ka agütsüba nung, Selection Committee for Empanelment of IT Firms senden ka December 7, 2022 nü mena recommendation agütsüba nung ajemdaker Government of Nagaland-i tsünglanglen agüka aliba IT Firms tem 2022-2024 mapang Nagaland state nung empanel asütsü shimer, ta ashi.

IT osettem agütsütsü atema iba osang sangdongba anogo nungi küm ana atema empanelment asüba IT Firms 21 ji itemi alitsü:

1. M/s Fira Tech - Main Road Razhu point opp. Axis Bank Kohima
2. M/s Beits Enterprise - Peraciezie High School road Kohima
3. M/s Eastern Computer Agencies- Opposite Bank of Baroda Kohima
4. M/s Excellogics Tech Solution - 57, Kohima Science College Jotsoma Kohima Nagaland 797002
5. M/s Future Infosystems - S3, Yehovi Complex, NL Road Dimapur Nagaland 797112
6. M/s Impact - 1st Floor Impact Centre point complex Y- junction opposite Old MLA hostel Kohima Nagaland 797001
7. M/s KK Enterprise - Ground Floor Room No. 1 Beits Plaza Phezoucha New Secretariat road Kohima Nagaland 797001
8. M/s Ramietech Solutions - 1, 87, Kuotsu Building P.R.

- Hill Kohima Nagaland 797001
9. M/s Mike Care - 2, 243, Chielie Complex High School New Secretariat road Kohima
10. M/s Chabou & Co - High School Area Kohima
11. M/s North Eastern Power Carrier - 1st Floor Elite Complex, City Tower Dimapur Nagaland 797112
12. M/s N.K Square - High School Junction Kohima 797001 (M)-9856645559
13. M/s Kohima Computer Centre - Main Road Main Town Kohima, 797001
14. M/s System Technologies - 1st Floor room no. 14 Belho Complex near Red Cross Kohima 797001
15. M/s One Bit - Opposite Head Post Office Chotobosti Women Society MMPC building near local ground gate Kohima
16. M/s Smart Techies Service - 3rd Floor, C6 C7 and D5, CK Arcade Near Head Post Office Daklane, Kohima Nagaland
17. M/s VRK Infotech - Sokhriezie T. Khel Market Kohima
18. M/s Computer Villa - K.T Complex, Circular Road, Flat No-111. H/No-111
19. M/s Xplore - H.No.61(F) Doulo Complex Circular Road Dimapur
20. M/s Nettek Computer - Keditsu 2nd Floor Building P.R. Hill Kohima
21. M/s Colosseum Tech Solutions Private Limited - Jail Colony Kohima 797001


आदि महोत्सव

जनजातीय उद्यमिता, शिल्प, संस्कृति, व्यंजन और वाणिज्य का उत्सव

श्री नरेन्द्र मोदी
माननीय प्रधानमंत्री

द्वारा उद्घाटित

16 फरवरी



February 16, 2023 nü Major Dhyan Chand National Stadium, New Delhi nung 'Aadi Mahotsav' - National Tribal Festival tenzükba sentong nung Ato kilonser, Narendra Modi, Tribal Affairs Union Minister Arjun Munda aser Union MoS for Tribal Affairs, Renuka Singh Saruta nunger tangokba noksa nung angur.

PM-i elections nung takok angutsü atema Israel teyari agir: Congress

New Delhi, February 16

(Agencies): Centre nung BJP-i aniba NDA sorkar maneni aija Brihostibarnü Congress party-i, elections nung takok angutsü atema Ato kilonser, Narendra Modi-i Israel nunger agencies teyari agir, ta tai tongloksü.

New Delhi nung aliba Congress party indang headquarters nung osangbenertem senden nung jembidang Congress otongdar ana- Pawan Khera aser Supriya Shrinat nati, Ato kilonser Modi-i democracy den asayar aser linük nung elections nung takok angutsü atema Israel nunger agencies teyari agir, ta metetdaksü.

Congress lenir ana jagisa, India nunger democracy lendong nung lir, kechiyong Ato kilonseri bendanger mitkar agencies den inyakba ajanga linük anema asalentong yanglur, ta ashi.

International journalist tem telok kati investigative report ka sangdongba nung ajemdaker Congress lenir anati Modi aitsür.

Shrinat-isa, international journalist tem telok kati, Israel nunger contractors-i alima nung elections aika nung shilem agiogo ta sangdong, aser parnok indang tongti tasaji tiyazü proksü atema lir; item agencies-i miima inyakbaji India nunga putetogo, ta metetdaksü.

"Iba ya sorkari memetetibo meinyaksü. Olulu prokba aser tiyazü prokbaji BJP IT cell inyakim den kasa lir," ta laisa metetdaksü.

Congress-isa, Modi sorkari taoba mapang Israeli special forces nung inyaker Tal Hanani aniba Israel nunger "Team Jorge" den inyaker, ta metetdaksü.

"UK, US, Canada, Germany, Switzerland, Mexico, Senegal, India aser United Arab Emirates ama linüktem nung social media nung tiyazü campaign agibaji Israeli team ajanga lir," ta Congress party-isa metetdaksü.

Shrinat-i, social media platforms nung Ato kilonser Modi 'followers' shilem 60 dak

tema taila lir aser Twitter nung taila accounts 18,000 lir, ta metetdaksü.

Tawa Rahul Gandhi-i leniba Bharat Jodo Yatra tembangba dak sendakba nung Supriya Shrinat-i, yatra agiba mapang nung BJP IT cell-i "Pakistan Zindabad" ta yimiyim ayimer tetsür chanu kati Rahul Gandhi ajuru, ta tai tongloka liasü, ta metetdaksü.

Congress otongdartem jagisa, BJP-i Nagaland nung terenlok lir ta jembibaji atangji nungbo tiyazü, kechiyong Northeast nung aliba state Nagaland nung mapa manguba tebilemsü tulu lir, gari lenmang tajung mali, electricity aser tzu water supply majung, ta metetdaksü.

Tenatisa, Nagaland nung yimti tulu ana- Dimapur aser Kohima na nung tang tashi electricity majung, tzu supply majung aser gari lenmang majung, aser tanungba yimitem nungbo ano iba dang nungjagi kanga agi tamajungba, ta metetdaksü.

Amritsar nung Punjab National Bank nungi auer anati sen lakh 22 auya

Amritsar, Tsüklai/February

16 (Agencies): Brihostibarnü Amritsar yimti kübok Macleod Road nung aliba Punjab National Bank branch nungi prangpong amer auer anati sen lakh 22 dak tema auyaogo, ta police-i metetdaksü.

Deputy Commissioner of Police (detective), Mukhwinder

Singh Bhullar-i, mejangiaba nisung ana scooter ka nung aruba sülen mask agia alisangji bank telungi ai, ta metetdaksü.

Mask agia alisang jagi pistol ka amer bank nung alir ajak dangji teka mekangang ta ashiba sülen cashier dang sen ajakji yanghu nung inokjang ta tuyu. Iba sülen auer anaji senji

bener scooter nungji ajen, ta metetdaksü.

Iba bank ji deputy commissioner of police (law and order) indang office nungi metre 100 shi dang pilar lir.

Iba tatalokba mapang nung bank nungji security guard ka danga maliasü, ta police-i metetdaksü.



February 16, 2023 nü New Police Lines, New Delhi nung 76buba Raising Day parade nung Delhi Police tetsürtemi shilem agiba noksa nung angur.

PCC-i Jammu & Kashmir nem state jenjang agüjang ta akhanger

Srinagar, February 16

(Agencies): Brihostibarnü Pradesh Congress Committee (PCC) Tir, Vikar Rasool Wani-i, Centre sorkari tangsa Jammu & Kashmir nem tanaben state jenjang agütsüsüla aser Srinagar nung Assembly election ayongzüksüla, ta takhangba agütsü.

Paisa Centre nung BJP sorkari Jammu & Kashmir nung tashi alia amshiba benoker, ta aitsü.

Srinagar nung aliba PCC headquarters nung osangbenertem den jembidang pai, "Tangsa Jammu & Kashmir nem tanaben state jenjang agütsüsü aser Assembly elections ayongzüksü atema onoki takhangba agütsür," ta metetdaksü.

Ajisüaka pai, National Conference (NC) Tir, Farooq Abdullah-i 'sorkari state jenjang agütsüsü tebilemba mali', ta jembibaji shidak dang jembigo, ta ashi.

"BJP-i yangi kijai tashi tali amshiba benokogo. Bulldozers mesüra Public Safety Act nung ajemdaker nürtem amokmerener. Kari danga pei tebilemba jembia ola adokra aputsü ta shia amokmerener," ta pai ashi.

Tang Jammu & Kashmir nung mapa manguba tebilemsü tulu lia ano sorkari ki

bendoktsüba aser aienshidaktsüba ajanga nürtem timtem bendenloksür, ta pai ashi.

"Tatishitsü agi, Ramban nung administration-i dokan 60 shibangtsüogo. Iba tetezü nisung 120 bo chiyunga alitsü mapa makai kümogo. Tanübo mapa manguba lenla nung Jammu & Kashmir ya temaba jenjang nung lir," ta pai ashi.

"Jammu & Kashmir nungertem sensak tiai yoker. Ketdangsertemi süngjang lu nungi züsentebatem jenjang ajemtsür, aser ibaji ajanga 'apple' lu ayimertemi ayong nung apple indoker mesüra süngdong nungi maonger. Süngjang lu ayimertemi ashiba agi, alu nungi züsenteba ayokba dang nungibo alu nung inyakdang sen indokbaji teimba kümogo," ta Congress lenirisa metetdaksü.

Kasa sentong nung Wani-i BJP, People's Conference aser Aam Aadmi Party (AAP) party tem nung inyaker aika Congress party nung agizüka liasü.

"Tesüiba ita 5-6 tsüngda party balala nung lenirtem aser party nung inyakertem aika Congress nung denogo. Rahul Gandhi leniba nung Bharat Jodo Yatra agiba sülen nisung aikati party nung adentsü asüngdang," ta pai metetdaksü.

Air India-Boeing ajanga India-US tesendaktep tajungba akümer: US



February 16, 2023 nü Fiji nung India External Affairs Minister, S. Jaishankar-i Fiji Tir, Ratu Williame Katonivere ajurudang tangokba noksa nung angur.

Washington/New Delhi,

February 16 (Agencies): Air India aser Boeing commercial tayimtsü na tsüngda tezüngzüktep agiba sangdongba ajanga India aser United States na tsüngda tesendaktep tajungba akümtsü atema maongka angur, ta US-i metetdaksü.

"Linük ana tesendaktep junga lir aser tang Boeing aser Air India na tsüngda tezüngzüktep agiba sangdongba ajanga ano tesendaktep tajungba akümer," ta State Department otongdar, Ned Price-i osangbenertem dang ashi.

Air India-Boeing tezüngzükteppi ajanga US kübok state 44 nung mapa million 1 tashi adoktsü, ta US Tir, Joe Biden-i metetdaksüogo.

Tasüngdangba ka langzüdang Ned-i, "Iba ya ataloktsü onoki bilema liasü. Iba

ya American nunger rongsenketzung aser iba linük nung mapa inyakertem atema maongka tajung dang masü saka India nungertem atema-a maongka tajung," ta metetdaksü.

Ned Price-isa, "Yashi Boeing aser Air India tsüngda tezüngzüktep agiba sangdongbaji, yangi mapa aika adokdaksüba, India nung maongka aika adokdaksüba aser linük ana tsüngda tesendaktep tajungba kümdaktsüba tatishitsütem rongnung ka lir," ta metetdaksü.

Mongolbarnü Air India-i dollar sen billion 34 agi Boeing 737 MAXs tayimtsü 190, Boeing 787s 20 aser Boeing 777Xs 10, ajak senteper tayimtsü 220 alizüksü atema tezüngzüktep agia liasü; ibaji ajanga US kübok state 44 nung mapa million 1 dak tema adokdaksütsü.



TIR YIMYIM YIMOBILEM (EDITORIAL)

DIMAPUR ROGONÜ, TSÜKLAI(FEBRUARY) 17, 2022

Külem sabang ya junger

Taküm Nagaland general election nung benshiba tajung kaji constituency aika nung lokti aser arogo balalai achaayanga election nung tokteper candidate-tem külemi sabang ka nung jaoka pei pei tebilemba, tejangraba aser nükjidong jembidaksüba ya asütsü. Atangji, asen lima nungbo ibai mezüing masü saka ano asen lima nungsa süaka tesem aika nung candidate-tem atema külemsabang anepalutsür mali, iba külemsabang sentong ya mekatetter. Item nungjia meilongi nübor tenzükneritem tejangraba aser nükjidong lemsateptsü asoshi külemsabang angutsü imlar. Nüboritem madak yimsü asütsü aser parnok tenzüksü asoshi nüboritem nem shimdaksütsü pur candidate-tem nüboritem nüboritem tsüngdangi anir arua pei tebilemba aser nükjidong shidaksüba nungji nüboritem masü candidate-tem tajangzük lir, kechiyong iba ama sentong jagi nüboritem pei constituency nung tokteper candidate-tem tejak angur aser parnok dak aketba sempet aser tangatetba metetter. Iba ama külemsabang nung candidate-temi shilem agia jembiba ajanga vote agütsütsü pur mulungjang meteta aser memeteti aika melenshir. Ibaji dang masü saka election mapang külemsabang nung nokdaker jembitsüba ya election sobaliba ka ama küma aoba ajanga tangatetba aser sempet mali ser tenüing agi mesüra rongsen akaba kisüing agi election-i aitsü purtem temulung iladaksütsü. United States nungbo tir election nung tokteperitem külemsabang nung jembidaksüba sentong ya pei kijai bilemba aser tangatetba shir anentsüba masü saka candidate o candidate na tsüngda o toktepdaksür. Ibajang, ano, jangratemtsüka. Aji oda, president kümner ana rongnung kati ka tangatetba nung toktepdang aser ken o nung aitsütepang nüboritem pei lima aser nüboritem asoshi shiba aser koba telok tajungba asütsüar angateter aser pa mesüra par telok yarir kümadoker. Atangji, democratic lima nung yimten telok aika alidak, nisung aika pei pei yimten telok tangatetba nung marakzüi nokdaka lir, anungji item atemajibo candidate-temi külemsabang nung jembibaji tongtibang masütsüa akok saka ano parnok dang nungi kanga agia teimba nüboritem, ano kecha telok nunga maden, shiba aser koba telok nem pei vote enoktsütsüar mejangja alirtem asoshibo külemsabang nungi candidate-temi jembibaji kanga tongtibang akümer, iba jagi parnok mulung meyiper aser shiba nem vote agütsütsüar peisasa telemtetba agiadoker. Ibaji ochiba mulungjang aser ochiba election akümer. Atangji, election mapang candidate-tem külemsabangi jaoka jembidaksütsüba ya temzüing ozüing nung aliba inyakyim ka masü saka temzüing ozüing shitak küma inyadaksütsü asoshi inyakba sentong tajung ka lir. US ama nungbo tir election nung tokteperitem o toktepdaksüba sentongji tagidak nung alima ajaklen nungi reprangtsüsa yoker, iba jagi asenok dena tajangzük angur. Iba amajisa masüyonga, tanübo asen lima nunga tesem balala nung candidate-tem külemsabang nung jembibatemi nüboritem ajaki reprangtetsüsa social media balala nung prokshir. Tangar lima assembly constituency-tem denbo asen lima assembly constituency-tem ya alijak aser nütsüing agi medemdangtsüla masü, asenok constituency 20 agi tangar constituency ka asütsü. Ajisüaka, asen lima nunga candidate ka asoshi election mapang kibong shiai tsüngdong aotsü tasak aser nisung shia ajurutsüabajibo tamakoktsü, anungji candidate-tem asoshia lokti aser arogoi külemsabang ka anepalutsüabaji kanga tajung aser tajangzük tulu lir. Iba jagi rongsen aser mapang aika kümzüker. Item tajangzüktemji meteta asen lima nungbo lokti aser arogo tentet tajung aika tenteta lirji, item jagi pei pei constituency nung tang dang nungi ano tajungba yimten külemsabang sentong yanglua agia aotsü ajungshir. Item lokti tentet tajungtem rongnung tzükong mesüra asen kin temaba kaketshir telongjemtemi lokti aser arogo meimba taintem ayongsemer, candidate-tem pei bilemba kisüing jembidaksüba sentong dang masü saka US presidential debates sentong amaji ayongzüka, ano telok nungia tasüngdangnertem nem maongka agüja asüngdangdaksüra, iba jagi asen lima election agiba yimya tajungba küma aotsü, nisung shitak shimtettetsü aser alima renloka aoba jakdaka angutsü.

OLEMSABANG

CHUBA NEBUKADNEZZARI SÜNGYANGLU KA MESO

~ Rev Dr. Mar Pongener, Executive Secretary, ABAM.

Nebukadnezzar chubai pa tashi aser temetetba dak temulung lemer hon agi süngyanglu ka yanglu. Iba süngyanglu süklep roker talang aser lenten nung süklep trok Babilon province Dura lenden nung meso (Daniel 3:1). Nüburtem ajaki iba süngyanglu tsüngdang apudaktsü ozüing tesashi agütsü. Tashi mangartem jangrua aliba mimung misem nung puoktsü ozüing tesashi yanglu aser yamaji inyak. Tsüngremi chuba den pungmang ajangaa jembi aser Daniel-i itemji ratetsü. Angar melenshi asübo jungla saka angashiba dak alaka memelenshi. Tesasatsüka! Nebukadnezzari pa tashi dak temulung lemadok. Babilon chuba kilem nung pai pei sasa ulua yamai ashi, "Iba Babilon tulu koba ni chuba alidak ni yanglua lir, ya kü pei tashi agi aser kü pei sentsüwangshi akhüm tulu asoshi masü no? (Daniel 4:30). Pa dak asüküm aser mezümeküm tanela tamajung aliba ajanga taküm aliba Tsüngrem jashidaksü aser iba taaji Nebuchadnezzar nungi YIMLI piladok. Tsüngremer terasaba o Nebukadnezzar dak atalok: nisung rongnungi pa aridok, nashi ama rem chidaksü, temang anüing azüngtsü agi metendaksü, pa kü mongzü tezüing ama kümdaksü aser pa temezüing ozü temezüing ama kümdaksü (Daniel 4:33). Tamaren yimli madak merena mener yimsüsüba chuba menden nungi teküpoktiba shiruru jenjangi ludaktsü. Asüküm shisatsü tener pei dak temulung lemer aliba Nebukadnezzar chuba dak ya atalok. Pei tashi sayua konang küma SÜNGYANGLU ka yanglua mesoba taa SHIRURU jenjangi ludaktsü.

Hon, süng, ajongli, lung amala agi yangluba süngyanglutem indang masü saka tanü asen tendak election mapang Tsüngrem O-i memelaba; ochimashi, ashikülak mapatem inyakba, pei meyongnem sen agi ayokba, süpokrem agiba, injang bomb amshiba, yi aser drugs agi voters alizükba, Khristan Yimsü samatsütsü merangba tanela tener inyaktepba, kati ka amokmerenba aser tepsetepba, japujari aser nüktapangta mapatem nüma tanga inyaktepba, item süngyanglutem election mapang Tsüngrem dak amangertemi mesoa külemteper. Item süngyanglutem mesoa külemteper ya alima lenir shimtsü asoshi inyaker saka Tsüngrem tsüngdang tesempatsü mapatem lir ta metetdi.

Anogo ishika tsüngda Nagaland nung tatartem shimtsü atema election agitsü. Tatar shimtsü pei meyongnem (vote) agütsütsü ya senso ka asoshi maongka ulura saka aibelena ibai amshira Tsüngremer terasaba asen dangi arulanglang. Election nung takok angutsü mechi meimchiri sentong aika yangluteper. Nisunger tashi aser temetetba dak temulung lemer tasa balala yangluteper. Rongsen dak rangloker asüküm aser ngasangatem mapatem inyakteper. Ibala mesükba süngyanglutem tapu balala yanglua nisunger mulungjang menentsüteper. Saka kechi komarka tashi amshia yimsüsür shimtsü aser menden nung amentsü merangaka, Tsüngrem metenra takok malitsü. Kechiaser Tsüngrem O nung yamai shia lir: Meimchir yimli madak tematibai yimsü asür, aser aji pai mulunger nem agütsür," (Daniel 4:25). Kechisarena Tsüngrem sentong nung atemtsü kechiaser Paji ajak Metetsang, Takoksang aser Taküm aliba Ochi Tsüngrem lir. Ibai angateta Tsüngrem chirtemi inyak nungbo election mapang süngyanglu külemertem masü saka Tsüngrem külemertem asen lima nung tali züintsü.

Tsüngrem dak amangertem asenok lir. Asen limai Khristan Yimsü arur küm 150 tashi amanga aruba chirnurtem aser semchisemnurtem asenok lir. Election nung takok angutsü mechi Tsüngremer sentong angatetsü tamang nung akanga sarasadema alitsü melen meimchir tashi

aser rongsen dak rangloker süngyanglu tapu balala züindaksüba mapatem inyaka takok angutsü merangra, Nebukadnezzar chuba ama tekupoktiba jenjangi ludaktsütsü Tsüngrem dak tashi lir. Mekümdangra shiruru jenjangi ludaktsütsü menua mali. Aruya aliba election nung tokteptsü aliba lenirtem nüburtemi meimer aser akümtsübur. Nenok tashitemet aser sempettem angudang pelar. Nai tongtetba jenjang aikati tongteta mali. Ao kin rongnungi election nung tokteptsüsa ne nem maongka agütsüba asoshi Tsüngrem tenüing asangtsüla. Saka na chuba menden nung amentsü mechi nüburtem makmakshimadaksüba, temesepba chiyungtsü talupusa anganüba, yimer aser kenunger rongnung rara adokdaksüba, injang bomb amshia ashikülak mapatem inyaktsü sentong yangluba, sen agi vote alitsü merangba, Tsüngrem tenüing teluja Pa temeshiba yimli samatsütsü tasa asabatem, item amala tanela tener yimsüsür menden nung amentsü merangra Tsüngremi mepelatsü. Tsüngrem tsüngdang ajemalua Pai mulungba angateta inyaktsü bilemdaktsüner. Ashiko, Nebukadnezzar chuba dak atalokba ama ataloktsüsa mapang ka arura koda tesasatsü aser takoksa asütsü.

Election nung senso shiaji kanga tongtipang. Senso shiai tangatetba takang yur pei meyongnem ajanga ochishir, mangdang akaba aser Tsüngrem akümtsübuba lenir shimtsü nüburtem dak tashi lir. Pei vote sen yong ayokba, süpokrem amshiba, temesepba chiyungtsütem lenir nungi akangba, kati ka dak taochi maka o tamajung shitepba aser rara menaba, election mapang mangar mesangwa tsüngda takar kümnüba, teyazü shisatsü bener senzüba, ki sünga osettsüset tasen alia ayutsü merangba, tanur school/college fees agütsütsü mechi teyazü sen bushiba, item mapatem yagi Tsüngrem mepelar ta angatetdi. Election süitemadoktsü. Teyazü nung bendenba rongsen tembangadoktsü. Ner ki telongi teyazü rongsen nungpoka aidaksüba jagi tejashi bener arutsür ta metetdi. Ochi mashiba mapatem inyakba ajanga kodanga tepela mangutsü. Asen lenirtem asoshi sarasademtsüdi. Akokba lenmangtem nung ochi nangri kanger parnok den yaritepdi. Ashiko, memelenshira Tsüngremi asen taküm aser kibong shiruru jenjangi ludaktsüra asenoki sasatsü.

Lenir ka shimtsü mechi election mapang temesepba chiyungtsütem chia jemer, mezümeküm o jembia, sen dak tenük yoker ngasangatema, Tsüngrem mali ama litemba jenjang nungi piladi. Tsüngrem Oi ashir Nenok asüküm kolak talangka angaka tetu, mesüra mezümeküm o tejembi." T Ken 75:5. Election mapang süngyanglu balala mesortem rongnung asenokbo matentsü merangdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Antakya, Turkey nung Khristan charity telok, Samaritan's Purse teloki field hospital ka amenokba mapang tangokba noksa nung angur.

NBCC-i Feb. 19 nü taruba assembly election atema sarasademtsü ayonger

February 16, 2023: February 27, 2022 nü Nagaland nung assembly election agitsü atema renemba mapang nung asenoki Tsüngrem akhümtsübutüsü nangzükba mamatoktsüla; asen tarutsü atema asen ket nung tashi lir ta asenoki bilemtetsüla, ta NBCC General Secretary, Rev. Dr. Zelhou Keyho-i sangdong ka ajanga metetdaksü.

"Tsüngrem tsübuba lenirtem aser taruba küm pongu asenok junga lenitsüpur lenirtem nem asenoki vote inoktsütsüla. Election mapang ya asenok tebilemba sayua vote agütsütsü aser tarutsü tia tajung yangertsü atema maongka lir. Election mapang tenangzükbatem ajanga asenok mashiokdaksütsüla. Tsüngrem tsüngdang kechi shidak, ibaji nai meteta dang lir. Na lenitsü atema Tsüngrem dang nungi shisatsü meshiang. Asen tammang ilatsüba teloktem lir aser politics tentung amer parnok par yimsü benoktsü meranger," ta NBCC sangdong nung shia lir.

"Election ya küm pongu nung khen anguba maongka lir. Asenoki asen vote temedenji shidak amshitsüla. Kechi tim, ibaji inyaksü atema asen tamang nem len anidaksütsüla. Asenok merumeru aser mapang tatsüka tajangzük angutsü mechi nung asenoki Clean Election Movement ya amajok mekümdaktsütsüla. Election merüka timi agibaji nisung ajak asoshi lir. Arogoi iba tayongzükba ya süoki ia agir, kechiyong tesüiba küm aika inyakyim meshidakba anema inyaksüji tanela tsütsü Arogo teinyaksü mapa ka lir. Nisung ka vote ka asütsüla, tangar melen vote meinoktsütsüla, vote malizüktsüla mesüra vote mayoktsüla. Kanga shisa kaa vote agüjang aser taruba election nungbo Khristan ka ama vote agüjang. Tangari jembiba mamangtsüla saka nü melung nung jembiba ola angaa inyaksüla. Iba election ya Naga nungner atema atangji temerük election ka südaktsüdi. Nü tarutsü tia atema vote agüjang aser Tsüngrem akhümtsübutüsü atema vote agüjang. Clean

election ya takoktsü aser iba atemaji telemtetba tajung ka dang agitsü nungdak," ta NBCC sangdong nung shia lir.

"February 19 (Amongnü) ner kiyong nung 'prayer walk' agiba sülen tongtibang tesemtem nung sarasadem sentong agiang. Anepdang tesem ka nung adenshia 6:00 ako nungi 7:00 ako tashi sarasadem sentong agiang. Arogotemi anogo piyong tekülem sentong densema sentong balala ayongzüka agitsü akok," ta NBCC-i metetdaksü.

Assembly Election atema sarasadem onüktem:

State tesem ajak nung Arogo züngsemtem ajaki kanga shisa kaa vote agütsüba ajanga lenir tajung shimtsü atema sarasademtsü

Vote agütsüba anogo tesünep nung tembangtsü atema sarasademang

Amokmeren kecha makai voters-i vote agütsütetsü atema sarasademang

Candidate 183 prongla ajemalutsü aser Tsüngrem akhümtsübutüsü tim inyaksü atema sarasademtsü

Tsüngrem tsübua aser Tsüngrem akhümtsübutüsü vote agütsütsü atema voters nem shisa tajung agüjang ta sarasademtsü

India nung reshikangshiba Khristantem atema-a sarasademtsü NBCC-i ayongzükogoo.

"Osang angazükba agi, alima nung Khristantem alitsü tamajungtiba linüktem rongnung India ya jenjang 10buba nung lir. Iba report ya kanga majung, kechiyong tema nungbo India ya secular linük ka ama sayur saka India nung telemsa adokdaksüba teloktemi tashiyim mapa inyaker. Anogo shia minority teloktembo kanga timtemer. Terenlok tentung amer Khristan densema tanga minority teloktem dang anogo shia tiyazü ashir," ta NBCC-i metetdaksü.

"Tema nungbo parnok linük nung Khristantem aser tanga minority teloktemi mapa tajung inyakba züngshia sayur saka asen vote temeden samatsütsü atema asalentong yanglur aser

India ya Hindu linük, ta jembir. Tenla kitem aser Arogo indang rejutem raksatsür aser anogo shia Khristantem amokmerener. Khristantemi tangar dak alia balaka mezüngshidaksüner saka asenoki kasa tekümzükba aser kasa temeden dang aginer. Asenok akhümtsübutüaksüner aser asen temeden balala züngshidaksüner. Asenoki iba ya linük dang nungi akhanger, kechiyong asenoki secular India nung tamang akar, kong ajaki kecha tetsüba kecha makai peii melugnba yimsü amangtsü akok," ta NBCC sangdong ajangasa metetdaksü.

India nung reshikangshiba Arogo/Khristantem atema sarasademtsü onüktem:

India nung Khristantem anema inyakba- telemsa adokdaksüba teloktem ozüng matsüngdangi anir arutsü atema sarasademang

Khristantem pei tamang jenjang manokshitsü atema sarasademang

Tiyazü nung tai tonglokja jail nung puoka alir Khristantem atema sarasademjang

Tenzükba wadang nung inyaker Pastor tem sademsadema inyaksü atema sarasademjang

India nung Khristantem tasü aittsü aser Tsüngremi kümzüktsü atema sarasademjang

Ketdangsertemi India junga yimsü asütsü aser tesempa proktertem nokdangtetsü atema sarasademjang.

"February 19 ya Nagaland nung election atema aser India nung reshikangshiba Khristantem atema sarasademba anogo asütsü. Asenoki tatok meshiba den külemi onük ana atemaji sarasademdi. Tsüngremi asen lima aneptsütsü aser Pa nükjidong ataloktsü atema sarasademdi," ta NBCC-i ayongzük.

"Kü nüburtemi Kü tentung jaa ajemalura aser sarasadema Kü tejak bushira aser temenen lenmang nungi meyipra, Ni kodak nungi angashitsü aser parnok temenen atokba den külemi par lima aneptsütsü (2 Putipuyang 7:14).

ANOGO ABEN TSÜNGREM DEN

Taidok Angutsü, Taidok Agüjang

"Aser ozüi kechi koda pei tai doka lir, aji oda ozü tai tokangma"- Matt. 6:12.

Tagizükba dang nungi tagütsüba sentiba lir. Asenok menen khuret bona arur, shiba dang asenoki mejungi inyak, pai asenok nem taidok agüja nüji kümdaktsü. Ibai koda tesüngmangtsü! Yisui nütsüngtem dang Tsüngrem dang sarasademba shia taidok meshia sarasademtsü sayu. Asenoki anogo shia Tsüngrem dang anogo shia tai menar ta Yisui metetta liasü, kechiaser asenoki Tsüngrem sentsüwangshi metongtetter. Tsüngrem dang tatok memeshi asenoki anogo kata süidaktsütsü makok.

Asenoki tangar dang tai atokba ama asenok dang tai tokang ta Tsüngrem dang sarasademang, kechiaser asenoki tai atokba ama kasa lenmang nung Tsüngremi asenok dang adoktsü ta Yisui nütsüngtem dang sayu (Matt. 6:15). Tsüngrem yimyaji taidok agütsüba lir (Anitet 34:6-7). Asenok Pa nütsüng süra, Pa tsüngsü nung jajatsüla. Tsüngremi taochi makaba tsükchir dang atoktsü süra, asenok tajemba inyaksü kecha mali. Tamajung karbo tai matoktsüla ta Yisui mesayu. Tai matoktsüla ta Laishiba nung tesayuba agüja mali.

Nai kar nem taidok agütsütsü sottadokra, ne teküdem aser sarasadem amajok (Matt. 5:23-24). Ne mulungjang nung memelungi iba nungi kümdanga alitsü Tsüngrem dang asüngdangang. Ne nungdak tatok nendaka mita aliba ajanga tangar majungji tesangwa dangi arudaktsütsü. Na Khrista ama alitsü Tsüngrem dang asüngdangang; süra na rishikangshi danga nai sarasademtetsü, "obala, parnok dang tai dokang."

Khristan charity telok aikati Syria aser Turkey dangi sen jenti yoker

February 16, 2023: Tawa menoknok agi kongshiba Turkey aser Syria na nung linüktem nem senji agütsütsü. Germany nung aliba Aid to the Church in Need (ACN)-ia Syria linük nem dollar sen 530,000 agütsütsü. Syria linük nung ACN-i partners yur project aika inyakdar.

Syria nung ACN-isa menoknok lendong nung ki raksar alir kibongtem para kidang alitsü atema teyari agütsütsü, ta sangdongogo.

Caritas network-ia menoknok agi kongshiba yimitem aser yimtsüngtem nung mattress, blankets, hygiene kits aser chiyungtsü lema agütsüdar.

Aleppo nung Syrian Patriarch Archbishop, Absi Melkite aser Catholic Patriarch Joseph Absi nati Damascus nungi Caritas staff tem den longjemer yimti nung aliba shelter homes trok nem chiyungtsü basket 1,300, mattress aser blankets lema agütsüogo.

United Nations-i menoknok Patriarch Archbishop, Absi Melkite aser Catholic Patriarch Joseph Absi nati Damascus nungi Caritas staff tem den longjemer yimti nung aliba shelter homes trok nem chiyungtsü basket 1,300, mattress aser blankets lema agütsüogo.

US nung amenoka aliba Pontifical Mission Societies (PMS)-i online ajanga tang tashi nung dollar sen 200,000 bendenteta lir aser tan hopta tatemlen tashi bendenba sülen

Caritas Syria team-i Lattakia nunga teyari oset balala agütsütsü.

AO OSHI ANGAZÜKDAK: TANÜ ANGAZÜKTSÜBA OJANG



Otongtar

(n)osang belener, osang shishia aoer (messenger)

* Alemlibo otongtar bang agidang osang metetdakja ao.

Otsü

(n) taoba mapang tatalokbatem, süiren (history, story)

* Tesayuri tanurtem dang Yosef otsü ashi.

OLONG PAITEP # 6431

Grid for crossword puzzle #6431 with numbered starting points 1-19.

TIPIEN

- 2. Teburtemi tejak nung awaba - (8)
6. T _ _ _ em - (3)
8. Tzük ayudak - (3)
9. Nungdakba dang timba - (6)
11. Zuina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azütsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6430 TELANGZÜBA

TIPIEN :

- 1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

- 1. Tenükjang, 2. Luden,
3. Kioktsü, 5. Lenti,
7. Tajangzük, 11. Teronem,
12. Sempa, 13. Jahaz.

ELECTION RALLY : Leader : Moi kitia "Haliluya" kobo sob manu "Praise the Lord" kobiti? Haliluya.... Crowd : Praise the Lord. Leader : Very good, aro moi kitia "Long Live" kobo, sob milikina "Bejebe" kobiti? Long live... Crowd : Bejebe (Tang Nagaland nung tamanger tia) ~ Lilir : SWhatsApp

Tepela Tasoba Anogo Tanur asoba anogo nung salem osang den noksa angati adokdaksüna - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang. 1. Tenüng : 2. Tasoba anogo: 3. Küm : 4. Class : 5. School : 6. Talidak : 7. Salem osang :

Süngratsü yimtak Impur A/C nung candidate-tem nükjidong lemsatepba sentong aka



Süngratsü yimtak Senden Salang nung 23rd Impur Assembly Constituency nung 14th Nagaland Legislative Assembly election nung tokteper NDPP Candidate Wb.T.N.Mannen IAS Retd. aser Congress candidate Wb.Bendangkokba IAS Retd. tena prong külemi election nung toktepba sangdongba aser tena nükjidong lemsatepba sentong agir kelen tangokba noksa.

Süngratsü, Tsüklai/February 16(TYO) :Tanu Süngratsü yimtak Senden Salang nung Süngratsü Village Council aser Süngratsü Senso Mungdang-i ayongzuka 23rd Impur Assembly Constituency nung 14th Nagaland Legislative Assembly election nung tokteper NDPP Candidate Wb.T.N.Mannen IAS Retd. aser Congress candidate Wb.Bendangkokba IAS Retd. tena prong külemi election nung toktepba sangdongba aser tena nükjidong lemsatepba sentong (Joint Declaration Programme)ka agiogo.

Tanu iba sentong nung NDPP Candidate Wb.T.N.Mannen IAS Retd.-i pa election nung toktepba metetdaksüba den ano pa nükjidong indang rasaa jembidang 23rd Impur constituency nung aliba Asetkong nüburtem küm 20

tashi opposition nung mener terenlok kecha makai dang aruogo, anungji Asetkong melenshia aintsüla, aji asünung nüburtemi tangatetba nung pei senti vote-ji sorkar yanglutsü party nem agujangta ashi.

Wb.T.N.Mannen IAS Retd.-isa Asetkong nung temelenshi alitsüla, Asetkong nung temelenshi bener arutsü mangdang aser nübur tenzüksü temelungtetba nung sorkar mapa nung Chief Secretary menden atongtsü lia takum tebenjem mapang nung nübur tenzüksü temelungtetba nung takum agi küm 4 buba tokteperta adenshia aliba Asetkong nüburtem ayongzka jembidi.

Congress candidate Wb.Bendangkokba IAS Retd.-ia pa election nung toktepba metetdaksüba den ano pa nükjidong indang rasaa jembidang nüburtemi dang pa

adokdaksüra pai Impur constituency nung aliba yim ajak sema jaja nüburtem ajurua terenlok asoshi shisa lemsatepba inyaksüta ashi.

Wb.Bendangkokba-isa Asetkong lima aser nübur ajak liromedem terenlok akatsü asoshi kanga dang nungtaka lir, anungji nüburtemi dang pa adokdaksüra iba dakji rangloker takok tashi lenmang balala bushia inyaksü temelungtetba tulu lirta shia adenshia aliba 23rd Impur Assembly Constituency nüburtem ayongzük.

Kasa sentong nung Süngratsü Senso Mungdang Tir Limasashi Ozükum aser Süngratsü Village Council Chairman Taka Longchar tenatia shilem agia jembiba den Candidate ana asoshi Tsüngrem temoatsü meshia Lolensobo Walling Asso.Pastor SBA-i sarasademja liasü.

Tripura nung nüburtemi onok nem maongka agütsütsü: Pradyot

Agartala, Tsüklai/February 16 (Agencies): TIPRA tekolakba Pradyot Debbarma-i, taküm state assembly election nung Tripura nung aliba nüburtemi par party nem maongka ka agütsütsü ta ashi. "Tripura nung aliba nüburtemi onok nem maongka ka agütsütsü," ta TIPRA tekolakba Pradyot Debbarma-i ashi.

Paisa, "onok takhangbaji nüburtem nem temzüng ozüng kübok temeden agütsütsü asoshi lir aser iba sülen onoki CM menden abentsü atema jembitsü. Party ajaki election

agiba anogo ya ashitsü, aser nia onoki menden 31 akoktsü ta ashir," ta Pradyot Debbarma-isa shisem.

Pai ANI dang ashiba agi, "ruling party-i Dhanpur aser Mohanpur nung mepetmesü atokdaksüba osang onoki angazükogo."

Pai, par party-i ozüng alema inyaksangshiba aser EMV mapa shitak minyakba indang tashishiba agütsüogo, ta ashi.

"Onoki Dhanpur aser Mohanpur nung ozüng alema inyaksangshiba aser EVM tem mapa shita minyakba indang

tashishiba agütsüogo. Ni vote agütsüba inyakyim ajak m a m a n g d a n g tembangdaksüner," ta pai ashi.

Tripura ajunga nung security akang akanga yur assembly menden 60 atema vote agütsü Brehostibarnü 7 ako nungi tenzuka liasü.

Taküm Tripura election nung tetsür lakh 13.53 densema voter lakh 28.13 züngoksemer liasü aser menden 60 atema candidate 259 liasü kong tetsür 20 dena liasü.

Iba election atema TIPRA puria candidate 42 yokogo.

NPP-i Garo Hills nung menden ka danga makoktsü: Abhishek

Tura, Tsüklai/February 16 (Agencies): TMC national general secretary Abhishek Banerjee-i, taruba Meghalaya assembly election nung Garo Hills nung Mamata Banerjee-i aniba party-i takok tajung angutsü temulung lema bilemba lemsatepogo.

Pai ashiba agi, Meghalaya assembly elections nung Garo Hills tesem nung tang sorkar kümteter aliba National People's Party (NPP)-i menden ka nung danga takok mangutsü.

Temetetsükaji Meghalaya kübok Garo Hills tesem nungi assembly menden 24 lir.

Bodhbarnü Tura nung roadshow tulu ka ayongzuka agiba mapang Abhishek

Banerjee-ia shilem agia liasü. Paisa, Meghalaya chief minister aser NPP national tir Conrad Sangma-a pa menden nung tamakok angutsü ta ashi.

"Conrad Sangma pa menden nunga jenjang mejungi kümdar. Taoba ita trok tashi nungbo parnoki idak TMC pur tamendakdak kecha mali ta shiogo. Ajisüaka tang parnoki jembiba, tweet aser osangtem reprangdangra parnok anogoji TMC aija tenzükur aser TMC anema jembia tembanger. Iba ajanga parnok koda tsübur aji sayur," ta Banerjee-i ashi.

TMC-i tenangzükba 10 agütsür aliba ya Meghalaya nung sorkar kümtetba sülen ita asem tsüngda ataloktsütsü ta nüburtem

nem tenangzükba agüja, Banerjee-i, "kechi tia tensa ajurudir ajuruang TMC nenok den teti alitsü aser ochi mashi, mapa majetba aser mapa shitak minyakba NPP sorkar anema raraba mapang nenok den noktaka alitsü ta ni tenangzükba agütsür," ta pai ashi.

NPP party aija Abhishek Banerjee-i, "Meghalaya nung tangar nem anishidaksüba sorkar ka menüngdaker. Delhi aser Guwahati nung mena aliba lenirtemi kechi shidir iba sülen tsüngsanga anidakba lenir Meghalaya-i menüngdaker ajisüaka nüburtem atema rarartetba aser nokdaktetba chichiba lenir Meghalaya-i nüngdaker," ta ashi.



Turkey south tsütsü Antakya nung ki ka chireper alidak nungi rescue team züngsem temi nisung tasümgang ka agiteta bener aoba noksa nung angur. Taoba hopta menoknok ajanga Turkey nung nisung 35,000 dak tema süogo, koba küm 100 nung tesashitiba lendong akumer. Asürtem ya ano alitsü aser iba lendong nungi jenbur nisung meyirijang aika talidak ki maka lir.

Panama bus lendong nung migrant 39 asü

Panama City, Tsüklai/February 16 (Agencies): Central America nung aliba Panama linük nung migrant 60 dak tema mena aliba bus ka longren-i lua nisung jenti asü.

Bodhbarnü iba lendong nung migrant tem nisung 39 shi asü aser 20 shi yiru.

Ketdangsur temi tang tashi item telok ya koba linük nungiar osang lemsatepa mali, aser parnok ya Colombia aser Panama tsüngta lendong aliba Darien Gap ajanga aru, ta ashir.

"Iba lendong nung asür kinunger den sorkari asükhü lemsateper aser khen-khen jajaba lenmang asüoktsü aser lendong ajurur alirtem den maneni yaritepsü," ta Panama Tir Laurentino Cortizo-i Twitter nung ashi.

Pei linük nung rongsenketzung jenjang majungba, alimar yimya nung lendong-tsüdong aser tensa majungba ajanga migrant tem ya takum jenjang tajungba yanglutsü asoshi danga linüktem bushia lendong tulu aliba lenmang nung jajar.

Darien Gap ajanga aruba migrant tem ya Panama sorkari Costa Rica den arütsü anasa camp kati anir aor. Migrant temi bus ticket alir aser yimya agi National Immigration Service nungi ketdangsur den driver ana alir. Nisung shibelener temi timtem agütsüba nungi kumzüksü mechi bus tem ya külemi jajar, ta iba tesem nung aliba immigration ketdangsur kati ashi.

Panama indang National Immigration Service director Samira Gozaine-i ashiba agi, bus ya migrant tem atsükoka aliba tesemi aitba alema ao aser meyipba mapang danga bus ka den tsükteper longreni alu südi.

Bus nungya nisung 66 mena liasü aser yirur alirtem rongnung tanur pongu dak tali lir, ta Panama health ministry ajanga ashi.

Nisung kar Chiriqui province indang yimtiba David nung mozü kidangi ambulance ajana bener ogo, ta ketdangsurü ashi.

Panama nung küm ter tsüngta migrant tem dena lendong ajuruba rongnung ibai tamajungtiba lir.

Darien Gap ya mile 60 talang arem min den arem shiruru, ayong aser mapang tamajung inyaker teloktem agi sünga lir. Iba tesem ya Colombia aser Panama tiyong nung lir, kong migrant tem senzüba tali akumer aser taoba küm nisung 250,000 jungnüa iba lenmang ajanga jaja liasü. 2021 küm iba tesem ajanga migrant 134,000 ao.

Institute of Legal Medicine and Forensic Sciences of Panama nung director general Jose Vicente Pachar-i ashiba agi, 2022 küm Darien Gap ajanga aodang migrant 60 shi asü aser 2021 küm 50 shi asü.

Iba tesem ajanga arurtem ya timba Venezuela nungi lir, kong rongsenketzung aser security majungba mechi 2014 küm nungi tang tashinung nisung million tenet jungnüa ainshio.

Taoba mapang Venezuelan refugee aser migrant tem ya United States arütsü atongtsü meranga Mexico leni ao, saka Mexico aser danga Central American linüktem nung visa ozüng tasenba mechi aika Darien Gap ya ajanga aor.

Imran Khan-i ex-army chief Bajwa anema bushisüngdangtsü akhanger

Islamabad, Tsüklai/February 16 (Agencies): Taoba army tekolakba Qamar Javed Bajwa-i oath of office aibelenba atema bushisüngdangtsü, ta taoba Pakistan ato kilonser Imran Khan-i Tir Arif Alvi dangi shiti ka zülü.

General Bajwa ya Chief of the Army Staff ama alidang oath of office nung aibelen, ta Imran Khan-i ashir.

February 14 nü züluba shiti nung Imran Khan-i ashiba agi, General Bajwa-i osangbener Javed Chaudhry dang 'onoki' Imran Khan ya maneni yimsüsüba menden nung lira linük asoshi lendong ta azüngshir, ta shia liasü.

Pai 'onoki' ta athishia jembiba ya shirnok ta General Bajwa dang asüngdangtsü nungdaker, ta taoba ato kilonseri ashi.

General Bajwa-i Ato

Kilonser Shehbaz Sharif den sensaksemba recording tem ya Army Chief-i tenangzükba agiba aser meimchir temeden nung kanga aibelenba lir, ta PTI tekolakbaisa aitsü.

"Kechiba aser koba temelaba kübok Gen Bajwa-i miim sensaksem recording asü?" ta Imran-i asüngdang.

General Bajwa-i pa tenangzükba nung aibelen aser Russia-Ukraine rara nung shinga dena madentsü sorkar sentong yanglua aliba nung pai yimjak nung aibelener, ta pai shiti nung ashi.

April 2, 2022 nü Islamabad Security Conference nung Russia-Ukraine raraba Pakistan sorkar tamendakba anema Feneral Bajwa nokdak, ta Imran Khan-i ashi.

Russia-i Ukraine amakba ya General Qamar Bajwa-i künem

aitsüdadtsünü saka India tatishitsü amshia ni pai ashiba manga, ta Imran Khan-i Hombarnü shir liasü.

"Ato kilonser menden nungi alur küm ka sülen ni Russia nungi meyipa shilangba mapang Gen Bajwa-i küdang Russia-i Ukraine amakba aitsüdadtsünü. US den tempa tajung India ya neutral nung lir. Anungji Pakistan ya neutral nung alitsüla, ta ni pa dang langzü," ta Khan-i ashi.

Ato kilonser menden nungi pa atsüngdokba tasa nunga Gen Bajwa-i tongti shilem agi, ta Khan-i aitsü.

"Tanü Pakistan nung mepetmesü adoka aliba ajak Bajwa nungi tenzük," ta pai ashi.

Taoba küm November ita mapa nungi anisüngzüksang Gen Bajwa ya "super-king" ta taoba mapang Khan-i shia liasü.

SANGDONGER

Ao Region NSCN/GPRN, CAO Office ajanga osang ka yamai sangdonger. 10th November 2015 nung Chungtia yimden-i Yimjenkimong aser Changtongya na ken-O ka adokba ajanga koba NSCN/GPRN den teka amtep malitsü ta liasü, ibaji Chungtia yimden-isa meyipa agir aser aki ama teka amteper aotsü 9th February, 2023 anogo sangdongba metetdaksür.

Sd/-
Lanuwati Jamir
CAO, Ao Region,
NSCN/GPRN

Tai Nangzükba Sangdonger

Tanü 16th Feb 2023 anogo Shri S. Maongkaba Ozüküm, NPP candidate 24 Angetyongpang A/C Declaration sentong nung Chakpa Medemsanger Putu Chairman-i Shri. Tongpang Ozüküm nem moatsüogo ta iba anogo nung aibelenba yimlibilema Chakpa Lanurtem tsüngdang Chakpa Medemsanger Putu menden-i tai nangzükba lanurtemi iba osang nübur ajak dangi sangdonger.

Chakpa Lanur Tenüng nung:
1. Yongkongkilep
2. Nungshiwaten

China nung teintet rogotem longkak aiter

Beijing, Tsüklai/February 16 (Agencies): China nung mapa nungi anisüngzükter alir temi parnok indang medical teyari ajemtsüba anema yimtung nung longkak aita jajar.

Parnok ya Bodhbarnü Wuhan aser Dalian yimti nung tanaben adenshia liasü. Wuhan nungya COVID mezüng puteta liasü.

Anogo tenet nung tanaben longkak aitba ajanga küm nung khen agiba National People's Congress atongtsü hopta ishika lia Tir Xi Jinping indang administration nem tebilemtsü agütsür.

Mapa nungi anisüngzükta alirtemi sorkar nungi meyipa meshitsü akokba medical expenses tem ajemtsür ta provincial ketdangsur temi sangdongba sülen Wuhan nung February 8 nü mezüng longkak aita liasü.

Social media nung prokshiba video tem nung longkak aiter ya timba mapa nungi anisüngzükter alirtem liasü, aser healthcare jenjang timba akumba mapang iba osang ya sangdonger, ta parnok ashir.

Iba ama health insurance ken o ya provincial level nung ketdang asür, saka iba longkak aitba ya linük nung tesem balalai prokshia ogo aser ibaji ajanga China nung longkak aitba nung tashi lir ta amangba sayur.

Taoba küm tatemlen China nung lanur meyirijang aikati longkak aitba nung shilem agia sorkari zero-COVID ozüng tesashi agientsüsa akum, kechiaser nübur ajunga tendangba, ajungbena tesem ajaklen lockdown benokba ajanga rongsenketzung tia tamajungi yokba nüburtemi tsübo akum.

Ajisüaka coronavirus kanga kera linük ajungalen prokshia aoba mechi ajungbena China indang medical system nung temelenshi aru. Iba yongji nisung asür mejangjatet aser asürtem ya timba teintet rogotem asütsü amai ajiteter.

China nung COVID wave tesashi ka nungi adokba mapang ka nung mapa nungi anisüngzükter alir atema health benefits melenshir, koba temelenshi ka ta ketdangsur temi ashir.

Sentong tali awajemtsü nükjidong nung reimbursement levels ya ajemtsü saka social media nung iba sentong aitsürtemibo China ketdangsur temi nisung ajak dak COVID tendangba aser danga mera agiba nung indokba sen meyiba angutsü lenmang bushir ama angateter.

Wuhan aser Dalian nung aliba ketdangsur temi tang longkak aitba kecha memetet ta ashir. Police tem nungia telangzüba mali.

Wuhan nung mezüng longkak aiter rongnung yinsang-yinre mapa inyakba nungi anisüngzükta alirtem timba, ta Radio Free Asia ajanga ashi.

Sorkar anema longkak aitsü sentong ayongzüksü kanga tasak aliba linük ka nung parnok adenshia ya tang aliba social network tesendaktep ajanga yaria alitsü südi, kong sorkar anema longkak aiter nem temerenshi tulu agütsü aser tepuokdak ayur.

Social media nung video tangoker prokshiba nung teintet rogotemi global Communist anthem, Internationale tena liasü. Taoba mapangbo iba ken ajanga longkak aitba ya sorkar mesüra Communist Party anema masü saka parnok tejashi angatetdaksünüba ka liasü.

Bodhbarnü teintet rogotem noklang aika yimtung nung yimyim ayima jajaba nung adentsü merangba nungi nokdangtsü mechi Wuhan nung police temi anatsülen lenmangtem nokdanga liasü.

Küm asem tashi alima ajunga nung tashidak wara agi timtemba aser zero-COVID policy nungi timtem jenti ajurua adokba ajanga nüburtemi China indang health policy tem nung mepelar.

Asia Championships: India-i 5-0 agi UAE kokogo



Asia Mixed Team Badminton Championships nung shilem agirtem India team noksa.

Tsüklai/February 16, 2023 (Agencies): Asia Mixed Team Badminton Championships nung Bodhbarnü India team-i 5-0 agi United Arab Emirates madak takok ngua quarterfinals-i aitsü atema lenmang sadema lapoka yuogo.

Iba asaya atema nungtugu asayar PV Sindhu aser H.S. Prannoy na anisüngzükdakja liasü. Mongolbarnü Kazakhstan 5-0 agi akokba asaya nung tenapronglai takok ngua liasü. Tena melena tebur aser tetsür kija asaya nung Aakarshi Kashyap aser Lakshya Sen nati shilem agia liasü.

Bodhbarnü mezüngbuba asaya tebur kija asaya asaya aser Sen-i 21-16, 21-12 agi Dev Vishnu koka liasü.

Tanabuba asaya nung Aakarshi-i minute 26 dang agi Madhumitha Sundarapandian 21-6, 21-7 agi koka India 2-0 agi tejakdang aküm.

Tasembuba asaya nung tebur tarep asayar Dhruv Kapila aser Chirag Shetty nati 21-15 21-14 agi Dev Ayyappan aser Dhiren Ayyappan na koka liasü.

Tetsür tarep asayar Ashwini Bhat aser Shikha Gautam na aser tarep temeyokteper asayar Ishaan Bhatnagar aser Tanisha

Craсто nungeria pei tata asaya koka India-i asaya 5-0 agi akokba nung teyari agüja liasü.

Tetsür tarep asaya nung Ashwini aser Shikha nati Sanika Dhawan aser Akansha Raj na 21-7 21-4 agi akok aser tarep temeyoktep asaya nung Ishaan aser Tanisha nati 21-13 21-8 agi Latheesh Bharath aser Rajesh Nayonika na koka liasü.

India team taruba asaya Malaysia den asayatsü.

Iba asayamung nung telok ajak nungi temaba jenjang nung tembangba team ana quarterfinals atema qualify asütsü.

Ranking aibelena sangdongba atema ICC-i tatok meshi

Dubai, Tsüklai/February 16 (Agencies): Tebur Test team rankings aibelena sayaba sülen International Cricket Council (ICC)-i tatok meshiogo. Bodhbarnü sayaba ranking nung India team-i Australia ajateta temaba jenjangi atuba sayua liasü.

Test ranking nung India team temaba jenjangi atuba sülen ghonda ishika dang lir ICC-i tanga list ka saya liasü, kong Rohit Sharma-i aniba team tanaben tanabuba jenjangi alur liasü.

Nagpur nung Pat Cummins-i abiba Australia team innings ka aser run 132 agi akokba sülen Rohit-i aniba India team

ya temaba jenjangi atu asütsü ta bilema liasü.

Mongolbarnü cricket asaya achaayangba lokti tentet yagi sangdong ka ajanga aibelen asoshi tatok meshia liasü. "Technical aibelen kar aliba ajanga February 15, 2023 nü mapa tatsüka atema aibelena ICC website nung India team No.1 Test team ta sangdongba aibelen ICC-i agizüker.

"Iba aibelen atema onoki tatok meshir," ta ICC sangdong ka ajanga metetdaksü.

"Zimbabwe aser West Indies na Test asayamung tembangba sülen tesüsabuba ICC Test Team Rankings sangdongba nung Australia team maneni

temaba jenjang nung lir," ta kasa sangdong ajanga metetdaksü.

Australia aser India na Hoolbarnü nungi Delhi nung tanabuba Test asaya tenzüksü. Australia team-i rating point 126 ngua tang temaba jenjang nung lir aser India team-i point 115 nguteta tanabuba jenjang nung lir, ta ICC-isa ashi.

India team ICC World Test Championship 2021-23 final nung asayatsü atema tang meranga asayaba mapang ka lir. Kasa mapang nung Australia-a iba asayamung final nung asayatsü atema tetokteper rongnung ka lir, koba London kübok Oval nung June 7 nungi 11 tashi asayatsü.



Arun Jaitley Stadium, New Delhi nung India aser Australia na tanabuba test asaya metenzük tsüngda India Cricket team captain Rohit Sharma aser head coach Rahul Dravid nati pitch asadanga noksa nung angur.

Erick Thohir Indonesia National FA tekolak kumogo

Tsüklai/February 16, 2023 (Agencies): Indonesia football association (PSSI) tekolakba mapa abentsü atema Bresthostibarnü cabinet minister aser taoba Inter Milan mendenbuba Erick Thohir shimogo. Stadium nung nisung ajemsetpba lendong tulu ka atalokba sülen ita ishika lir iba mapa atema pa shimogo.



Malang, East Java kübok Kanjuruhan stadium nung taoba küm mepetmesü tulu adokba sülen nisung 135 aser safety standards indang süoki ia bilemba aikati lemsatapa liasü. Iba ken o bushisüngdangba sülen taochi makai tear gas aika amshiba ajanga iba lendong ya atalok ta ngutetogo.

Indonesia nung football asaya ya match-fixing ken o aser asaya repringertemi timtem agütsüba ajanga mepetmesü nung arudar aser Erick shiba 2019 küm nungi enterprises minister lir, pai FIFA den longjemer May ita Under-20 World Cup kecha tetsükdaksü makai asayatetsü atema inyaksangshitsü.

Instagram post ka ajanga pai, Indonesia nung tekümzüka kübok jangrademtsü aketba football asayatem tanaben meyipa bener arutsü nungdaker


ta ashi. "Asaya ya temerek aser takok südaktsütsü atema inyaksü nungdaker," ta Erick-i ashi, shiba Inter nung shilem tuluba ka pa meyong lir aser English third-tier club Oxford United nunga pa joint majority shareholder ka lir.

Iba osang sangdongba sülen tir Joko Widodo-i, PSSI tir tasenba lenisüba nung Indonesia nung football asaya renloka aotsü imlaba lemsatapa liasü.

Soccer analyst Tommy Welly-i ashiba agi, Erick shimba ajanga timtem adoktsü akok kechiyong pa cabinet minister ka lir.

Football asaya inyakyim dak sendakba nung Indonesia aiben FIFA den mangatettep adoka arudar, kong 2015 küm tepeyong suspend sütsüba densema lir.

Football asayar tejen Tulsidas Balaram süogo



Tsüklai/February 16, 2023 (Agencies): Asian Games nung Gold medal anguba India team nungi asayar aser Olympian Tulsidas Balaram, mapang talangka shiranga liyar Bresthostibarnü süogo, ta par kibong den kanga junga sentaka aliba source temi metetdaksü.

Balaram ya arishi küm 87 tain liasü aser pa Uttarpara nung Hooghly ayongküm nung ki ka nung liya liasü.

1962 küm Asian Games nung gold medal angusang ya taoba küm December 26 nü temang anepalutsü atema mozükidangi anir ao aser pa urinary infection aser tepok nung timtem aliba anepalua liasü.

"Pa temang tajungba kuma mao aser tanü 2:00 ako shi nung süogo," ta source kati PTI dang ashi.

"Pa shiranga aliba mapang state sorkar aser minister Aroop Biswas-i pa kanga junga anepaluba atema onoki kanga pelar," ta paisa ashi.

Balaram ya 1950s aser 60s nung India nung football asaya kanga renloka aoba mapang ka nung asayar ka liasü. Chuni Goswami aser PK Banerjee den longjemer asayaba mapang parnok asem dang ya 'the holy trinity' ta ja liasü.

Balaram-i Arjuna award dena agizükogo aser 1960 Rome Olympics nung pai kanga junga asayaba tang tashi kanga junga mangaoka lir.

Rome Olympics nung India team Hungary, France aser Peru den ata liasü. Mezüngbuba asaya nung India-i goal 1-2 agi Hungary makok, ajisüaka Balaram-i minute 79buba nung goal ka idakja pa kanga tushia liasü.

Iba sülen anogo ishika lir India-i France tera agi dang makok aser iba asaya nunga Balaram-i kanga junga asaya liasü.

Balaram shiba centre-forward mesüra left-wing nung asaya liasü pa temang nung timtem aliba ajanga 1963 küm asaya nungi anena liasü.

BILEMDANGANG
"Temeim agi na lurepdaktsütsü akok."